

СОЙБЕ

Тръклето. Би пенжардунук сойбе... Ухтавдири.
Нащи овас жангале по-бут катар о дешудуй сахакия...
Доперел, грабинел амен то прилепи кало - те ингалел амен пе
ппакенде ан животосте бичачуно, ппердо дехибе тай Дел!

Отте сиклямдири лиздратно изппучел амен аздрахили девлано
тай аме сар гили изппенас лес, давкка со къскандимнаса гаравас,
на мангас те дас вика - заптиестар бихрамоме, храмоме клювинас...
Сойбе, мистика, чачипе, бичачипе, черекин мамимнаске...

Потайно -трайнес... Бошявно, потайно ухтавдири.
Билулужано-лулужано марес галопи, галопяне англопениматя -
ппенде, бидоппенде ки космикани ччиб.
анде суненде сащиматна, талкувиме, баш кариг о агор, ама нейсе!

Сойбе, е дйесескоро ли синян енгелжийс, крисиме ппанлутно
ил па милинес лескере хакикатнипнаске те цибринел упрал
о животос хастретчийс ппанлутно, живдо, живде ттанесте?
Тай састи ират дас давия амаре керимнаске презал о дйес
тай нисар нанай те издас лес мамуй амари воля...

Сойбе... Диккло суно... Траш си туке презал о дйес те
сурвинес тут диликанес машкар амаре цамцаля сар ттув.
Ка гебердинес катар о беруля е цибриняке дашно ккамали,
зорали, дилинди... Бимерутно синян анди ират кали-инати!
Ту. Лулужарина кало - бидоресутно магяри!

Сойбе, со ли ка аччовел, те на авеса,
ил па те на иринеса амен ко ппендо срас?!
Ка хургярел ли о животос амаре гъндес бидрабарде
ан ленгере жамяле кафезйесте? Та-те умблавел пес о гаравдилипе
пе уче кулатар лубяни. Пе гаравде лубяне халишпириеске? Би мираса!
Тай те заживинас машкар булутя - жангале,
животос -парамиси, черхеня са жангале!

